



Rabu, 02 September 2020
Ogen: Jeremia 31:15-22



BUAH BARANGKU



Seh kal malemna ate adi si eteh uga keleng ate Dibata man bangsaNa. Nina Dibata, *"O Israel, anak kesayangenKu, buah barangKu si keleng ateKu. Tep-tep Kusinetken gelarndu, Kuinget kam i bas keleng ate; i bas kam lalap ukurKu, mekuah kal ateKu."*Kata buah bara enda terjemahen Karo si khas. Gelgel megati tupung danak-danak denga kita adi ndauh erdalan, itamaken orang tuanta (biasana bapa) kita i bas barana. Cakap Karona "ituakna" i bas barana. Seh kal riahna iakap sekalak anak tupung ia ituak i datas bara bapana. Ia enggo ganjangen asa bapana. Pengenenna pe enggo mbelang matana natap. Emaka tawa ia gedang-gedang dalam sabap la iakapna latih janah senang kal iakapna.

Emaka erti 'buah bara eme anak kesayang (Heb: segula) payo kal i bas terjemahen Karo. Ipelampang Dibata dalam bangsaNa mulih ku negerina jine. La perlu bangsaNa erperang. Italuken Persia kerajan Babil jenari lit Raja Persia si mehuli eme Kores. Ia me si ipake Dibata nuruh mulih bangsaNa kerina ku negerina. Kerina ugas-ugas si ibaba Nebukatnesar isuruhna gelah ibaba mulih.

Sada keriahen si mbelinna i bas kegeluhenta eme adi banci mulihken ku kuta. Erdandanken si e maka i bas wari tertentu: Natal, Tahun Baru entah Kerja Tahun tupung banci kita mulih ku kuta maka meriah kal si akap. Erdandanken si e maka lit nge kalak ibeligaina teptep wari seh hari 'H'na, tertima-tima kita. Bage me keriahen bangsa Israel i bere Dibata ia mulih ku negerina, isikapken Dibata kerina keperluanNa, ikelengiNa ia desken sekalak bapa.

Si idah ras si gejak nge kita selaku anak, buah bara Dibata? Ipehagana kal kita amin megati la ia sipehaga, ikelengina kita amin la ateta keleng man bana. Mari iergai diri ras geluhta selaku buah bara Dibata.